

職方典第六百四十四卷

大渡河部彙考

大渡河建置沿革考

總志

禹貢梁州之西境古西南彝祚都地漢定西南彝以祚都爲沉黎郡尋罷郡置東西兩部都尉
一治旄牛主外羌一治青衣主漢民並隸蜀郡東漢西部尉領蜀郡屬國晉李雄據蜀以漢嘉
蜀二郡地分置沉黎漢源二郡後復爲晉有廢漢源沉黎而置南陰平晉原寧蜀始寧四郡宋
齊并爲沉黎郡後周兼置黎州及沉黎縣尋廢隋復置縣及登州大業初廢州以縣屬臨邛郡
後省唐復置南登州尋廢後割雅嶺二州地置黎州後廢開元初復置天寶初改洪源郡尋改
漢源乾元初復爲黎州治漢源縣五代時前後蜀繼有其地宋屬成都路元屬土蕃等處宣慰
司明洪武八年省漢源縣改黎州長官司十一年以馬苻德征討有功襲授安撫司並置大渡
守禦千戶所萬曆二十一年馬祥無子妻瞿氏署掌印務瞿氏撫瞿益枝爲子祥姪馬應龍與
瞿氏爭印構釁交兵事聞以馬應龍子馬新受降襲土千戶職事附銜大渡河所隸四川都司

屬川南道

皇清因之以馬祿歸襲職土千戶屬布政使司設黎州大渡河守禦千總一

大渡河疆域考

總志

東至冲天山八十里

西至雜道長官司界一百三十里

南至越嶲衛界九十里

北至榮經縣界二十里

自所治至省城一千二百里至

京師一萬一千四百四十里

東西廣二百一十里南北袤一百一十里

形勝附

唐元和志州城三面並臨絕澗

唐通望碑記處越嶲叩蜀之中

宋王已盤陀寨記蜀之西門

樊柔直侯寶堂記南鄰六詔西接吐蕃

關沫若徼牂牁

宋題名記太祖以玉斧畫大渡河外棄羈縻州焉

東接冲天山不通路徑北接榮經縣西

連冷沈南通建滇鷄冠嶺拱列於前聖鐘山高擁於後瀘河繞其東西羊腸帶其左右爲蜀川之門戶扼六詔之咽喉

大渡河星野考

總志

天文井鬼分野

大渡河山川考

總志

邛崃山在治北五里邛人自蜀入度此山故名一名邛笮山蓋邛人笮人界也其道至險有長嶺弄棟八渡之難楊母閣路之峻 登高山在治西五里峯巒高聳俯瞰城中通衢官舍民居一一可數上有小阜曰望州坡 聖鐘山在治東北五里昔有人聞山中有鐘聲及見五

色光現掘地果得巨鐘 白崖山在治西北一十里一名風穴山其傍有風穴間有氣出騰

空爲白雲須臾風起其聲如雷按明一統志在司城西北二十里 寶蓋山在治東南二十

里山形如蓋俗名涼織山溪中嘗有光彩 盤陀山在治東三十里按明一統志在司城南

三十里 大田山在治西南三十里下有水田按明一統志下有大井水田 筭箕山在

治西北五十餘里曰前箕又行數十里曰後箕山多笋故名樵蘇者以爲衣食之源號曰錢箕
按明一統志又多林木 試劍山在治南八十里塹然高聳山列三峯中峯又析爲三狀如

劍削故名按明一統志中峯又析爲二 冲天山在治東八十里山極高峻勢若參天

牛心山在治西八十里上有土阜形如牛心 避瘴山在治南九十里近大渡河風瘴氣夏

秋最多土人移居此處避之 和尚山在治東一百里其峯矗立盤紆十餘曲方至其上晴

日常有五彩光現千態萬狀極爲奇觀 獅子山在治東北一百里以形似名乃陶道人得

道之地 通望山自大渡河南與衆山相連入嵩州 朝陽山在治北一百里隋唐於其

下置朝陽縣城址尙存 飛水山在治東北二百五十里與榮經接界險惡不通人跡

畫崖山在治西北一十五里山勢險峻山外卽生蕃界 飛越山在治西北兩面與羌戎接

界爲沉黎西境之要害唐於此置飛越縣 大鳳山未詳所在 鷄冠山未詳所在

大小關山山勢陡峻一人扼險萬人難登 靈應洞邛崃山有巨蛇蟄其中蜿蜒錦文又號

爲靈應將軍洞 仙人洞在白崖山北狀如車輪欲入者必削匍方能過其中空闊行數十

步泉聲琮琤石髓溜結幽致萬狀

風洞在西南山十里歲時祭祀缺則風甚

乾濕洞

在避瘴山側有二洞一空闊高燥一有水出其中有趺坐龜蛇之類皆崖石自生不假人爲凡瘴動時飛鳶皆集此山瘴已乃出土人欲知惡瘴以鳶爲候然鳶出必在立冬前後古謂飛鳥得氣之先於鳶亦可見也按明一統志有牀坐竈突之類

龍洞在文武堡之下離城六十

里歲時祭祀缺祀則瘴甚

彈琴谷在治西北一十里水出溪口聲如彈琴

盤龍谷在

漢源鎮東北

大渡河源出土蕃經於城南九十里東注嘉定入於岷江

流沙河未詳

所在

兩澗水在治東西各有澗至登高山下合爲一漢源之田仰之灌漑

梵音水在

治南一十五里俗傳唐三藏至此持梵音而泉湧出故名色如米瀋味甘宋政和間太守宇文侯過而飲之曰佳泉也易名燦玉泉按明一統志泉南數十步有二石一號袈裟石五色相間一號曬經石皆三藏遺跡

漢水源出飛越山流經城南一十里東入岷江一名流沙河按

明一統志流經城南三十里

羅目溪在治東南廢縣北

璃溪在治西南四百里接蠻

羌界

渥洼池在蠻部內產馬其前後之田皆膏腴昔首領亦號鬼主有印篆文曰武韃水

軍莫究所自

龍池在治京十里池前有龍祠內有枯楠三株如龍形觸之則風雨暴至海

棠池在治北五里環池皆海棠郡守賓僚遊晏之地

白雲泉在治西北五里按明一統志

在司城東北五里

馬跑泉在和尙山俗傳肉齒和尚乘白馬至山下馬渴跑地泉爲之出

大渡河城池考

總志

大渡河城池土城唐韋臯築明洪武間總兵官安慶侯令成都右衛千戶朱徵用石砌門四京西二壕深二丈四尺

大渡河關梁考

總志

黑崖關在治西二十里明洪武十六年置

青溪關在大渡河外唐韋臯鑿之以通郡蠻號

曰南道爲重鎮

天漢橋在舊所治南九十里宋紹興間建

叱馭橋在治西宋太守李

石有記

跨虹橋按所志明萬曆中建

大渡河公署考

總志

黎雅大渡河土千戶所今改千總廳

大渡河守禦千戶所在治西北經兵火廢

大渡

河巡檢司在治南九十里

建昌道分司廢

分巡道分司廢

玉淵公館在舊黎雅

州城內宋開禧間建

大渡河學校考

所志

大渡河土千戶所儒學宋紹興二十年建今廢無學碑記尙存諸生散寄於榮經雅州二庠
海棠池書院唐韋臯爲四川節度使駐師黎城以禦南詔建海棠池書院今書院已廢池蹟尙存
玉淵泉書院宋薛紱爲漢源縣令建玉淵泉書院

大渡河賦役考

所志

本所設屠極邊石厚土薄俱是瘠鹵下田不及有司州縣之一鄉明止徵草字糧色銀二百七十兩以給過往夫馬之費併春秋祭祀及祭風龍二洞之需本地支銷不入正賦

皇清定鼎土地墾闢自康熙二年清丈增至五百八十七兩零每年解赴藩司已入正賦

大渡河風俗考

總志

郡志地處極邊俗混彝漢

宋余授朱纓堂記蠻商越驛氍毹椎髻交錯於園園中

寶宇記每漢人與番人博易不用見錢漢以細絹茶布番以紅椒鹽馬

宋史黎州諸蠻其俗尙鬼謂主祭者鬼主故其酋長號都鬼主 地瘠民貧石厚土薄三冬

無雨四季多風其人朴實頗慕文學獼猴相雜不尙浮華刀耕火種背駝營生布帛貴而耐雪

霜氣候舛而苦嵐瘴

大渡河祠廟考

總志

風雲雷雨山川壇在治南

社稷壇在治西

厲壇在治北

旗纛廟在治後千戶朱

禎建

城隍廟在治東明崇禎己巳重建

文昌祠在治西宋紹聖間建

武侯祠在

治北二里榜曰天威廟又作二室塑唐韋臯及李德裕像按明一統志在司城北三里宋紹興

中郡守邵溥因舊鼎新

王尊祠在邛崃山下

靈應祠在古沈黎城北祀漢越雋太守

任貴按明一統志宋薛紱記任侯殺王莽郡守枚根自領太守岑彭伐蜀遣使迎降及劉尙繫

益州恐任分其功乃誣害之任以冤死史臣不爲力辨使其附漢之志未明爲可哀也

趙

雲祠在安靖壩左

顯應祠土人傳文昌帝君修煉於此

姜維廟在治西安山上

武威廟在治西祀漢將馬忠

飛越廟在治西二百里舊屬雜道長官司

寺觀附

崇寧寺在舊司治北按明一統志在司城北四里

永興寺在舊司治東明永樂元年建按

明一統志古龍興故址

大渡河兵制考

總志

黎州大渡河守禦千總一員

大渡河物產考

總志

牛黃

麝香

升麻

筍竹杖

天南星

紅椒

松明

大渡河古蹟考

總志

沉黎城在漢原鎮附近十餘里漢武帝置郡後周黎州唐登州皆置於此或云在古嵩州之城

舊黎州城在聖鐘山下古城又在河外

武侯城在舊黎州城外三里武侯所築壕塹故壘

存焉又有武侯戰場在安靖新寨

三交城在飛越山下唐時築舊名三礪後訛爲三交

琉璃城在大渡河南唐太和中節度使李德裕築

陽山城在大渡鎮西唐初置陽山縣屬

登州後屬黎州

銅山城在舊所治東一百八十里

定蕃城在舊所治東南二百二十

里二城俱唐貞元間韋臯築

仗義城在治南一十里唐李德裕築以制西番其在境內者

又有廓清肅寧大定番倉等城按明一統志唐太和五年築

要衝城在治南一百里臨大

渡河唐韋臯築俗呼沙米寨

王建城在治北十五里地名木瓜關蜀王建時築

漢源

廢縣在治南三十里隋置唐徙治於州郭縣改爲鎮

通望廢縣在治東南九十里本陽山

縣唐初置登州天寶初改爲通望縣屬黎州宋省入漢源縣

飛越廢縣在漢源西北一百

里唐置屬雅州開元屬黎州宋省

大渡廢縣在治北一百里唐置屬雅州後廢爲鎮入飛

越縣

三藏黎舊黎州治世傳唐三藏遊西域經行植黎杖於此云他日州治在此後果遷

如其言其後黎成株高五丈圍八尺宋天聖間州治火人取其枝以接他枝

夜叉穴博物

志蜀南沉黎山有物似猴長七尺能人行名曰獼路見婦人則盜之入穴西番部落最愛之寶

宇記云在慶曆鄉山嶺有一石洞壁間有夜叉像土人祠之號穿巖將軍按明一統志是西番部落最畏之

叱馭處

風穴在白崖山山有巨穴四圍津潤如汗間有氣騰如白雲里人因以占風室穴

則風少瘴多開則風多瘴少

大相公嶺在治北三十里武侯南征孟獲經此故名宋時觀

祭使行部至此口占詩曰窮冬按部極陞西鳥道盤空積雪迷爲國憂民寧憚遠萬重山裏到沉黎

夢黎城在松坪彝地採樵者偶見城郭隱隱尙存著意尋之不見

七擒橋孔明

擒孟獲於此後人建橋故名今橋已廢古蹟尙存

靜鎮堂在舊黎州東隅後改曰君子堂

左右有藏春留香二亭及思仙臺

三山堂堂東與試劍山三峯相值按明一統志在靜鎮

堂東

澄心堂在舊司廳東

搖香亭與地紀勝在兵馬司前有酴醿芙蓉之勝

喚

魚亭在舊州圍東有湖湖方廣千丈芙蓉萬蓋錦鱗千尾架橋其中揭亭橋上曰喚魚

陵墓附

三王墓在舊漢源縣東唐史載卬黎之間有三蠻王使伺南詔劉志遠爲恭化郡王郝全信爲

和義郡王楊清遠爲遂寧郡王卒葬於此

大渡河峒蠻考

宋

太祖開寶六年夏四月丙午黎州保塞蠻來歸 按宋史太祖本紀云云 按蠻夷傳保塞蠻

開寶間其蠻七十餘人由大渡河來歸時時來貨其善馬

高宗紹興二十七年詔免唐榷陳伯強官以弭邊釁 按宋史高宗本紀不載 按蠻夷傳紹

興二十七年川秦都大司言漢地民張太二姑率衆劫殺市馬蠻客崖過等恐敗邊釁已加慰

諭併償其直矣詔免知州唐榷及通判陳伯強官抵首賊法

孝宗乾道九年吐蕃兩次入寇俱平之 按宋史孝宗本紀乾道九年二月乙亥青羌奴兒結

寇安靜砦黎州推官黎商老戰死秋七月壬寅青羌奴兒結降辛亥吐蕃彌羌畜列陷安靜砦

引兵深入黎州守臣誘邛部川蠻擊却之 按蠻夷傳彌羌部落乾道九年吐蕃青羌以知黎

州宇文紹直不讎其馬價憤怨爲亂詔師憲撫安之紹直置免青羌首領奴兒結等市馬黎州

大肆虜掠權州事王昉多給金帛亟遣還宣撫使虞允文言昉貪功恐他部効尤漸啟邊釁詔降昉兩官十月黎州吐蕃復寇邊攻虎掌砦詔四川宣撫司檄成都府調兵二千人戍黎州以禦之

孝宗淳熙二年青羌奴兒結乞盟旋復入寇制置使范成大築堡禦之按宋史孝宗本紀不載按蠻夷傳淳熙二年奴兒結還所虜生口三十九人黎州與之盟復聽其互市給賞歸之制置使范成大言所虜未盡歸我豈可復與通好詔謫宇文紹直編管千里外成大增黎州五砦籍強壯五千人爲戰兵吐蕃入寇之徑凡十有八皆築堡戍之奴兒結率衆二千寇安靜砦成大調飛山卒千人赴之度其三日必遁戒勿追已而果然青羌奴兒結爲邊害者十餘年其後制置使留正以計禽殺之盡殲其黨

孝宗淳熙七年夏四月黎州五部落蠻入寇六月官軍敗績遣都大提舉茶馬吳總往平之冬十月五部進馬乞降詔却其馬按宋史孝宗本紀夏四月甲辰黎州五部落犯盤陀砦兵馬都監高晃以綿潼大軍三千人與戰敗走蠻人深入大掠而去夏六月壬辰五部落再犯黎州

制置司鈴轄成光延戰敗官軍死者甚衆提點刑獄權州事折知常棗城遁甲午制置司益兵遣都大提舉茶馬吳總往平之秋八月癸未禁黎州官吏市蕃商物甲辰五部落犯黎州寨與州左軍統領王去惡拒却之折知常重賂蠻使之納款冬十月乙未黎州五部落進馬乞降詔却獻馬許其互市 按蠻夷傳部落蠻有劉楊郝三姓淳熙七年十月黎州五部落蠻貢馬三百匹求內附詔許通互市却其所獻馬

淳熙十二年春正月四川制置使留正遣人誘青羌奴兒結殺之二月置黎州防邊義勇 按宋史孝宗本紀云云 按蠻夷傳淳熙十二年趙汝愚代爲制置使或謂殺降不祥必敗邊患汝愚不爲動但分守險要嚴備以待之

十三年黎州蠻三開入寇代制置使趙汝愚破之 按宋史孝宗本紀不載 按蠻夷傳淳熙

十二年趙汝愚代爲制置使明年奴兒結弟三開果入寇邊備完固三開不能攻走歸汝愚懸重賞以間羣蠻三開不能孤立遂以憂死時虛恨蠻族最强破小路蠻併其地與黎州接壤請通互市汝愚以黎州三面被邊若更通虛恨蠻恐重貽他日之憂不若拒之爲便帝以其知大

體從之尋汝愚以定青羌功加龍圖閣直學士

寧宗嘉定九年十二月己卯黎州蠻蕃卜寇邊 按宋史寧宗本紀云云 按蠻夷傳嘉定元年十二月彌羌蕃卜由惡水渡河寇黎州破碉子砦初蕃卜弟悶巴至三衝爲人所殺又徙白水村渡於安靜砦羌人患之蕃卜遂與青羌詣邛州欲假道女兒城以入寇守臣楊子謨諜知之數以貲遺其都王母俾母假道時時餽米以濟其饑蠻人德之會趙公庠代爲都斬不與蕃卜遂得假道渡河攻蒔坪砦掠三松蠶砂橫山三增白羊諸村郡遣西兵將黨壽禦之失利復遣統領王光世往羌人由蒔坪以革船渡河光世憚之留屯三衝不敢進羌人焚掠既盡渡河而歸

寧宗嘉定二年州黎蠻犯邊官軍討之未下 按宋史寧宗本紀嘉定二年二月庚午黎州蠻寇邊八月己卯黎州蠻復寇邊十二月甲子四川制置大使司調官軍討黎州蠻敗績 按蠻夷傳二年二月復寇黎州良溪砦官軍敗績

三年十二月辛巳黎州蠻請降 按宋史寧宗本紀云云 按蠻夷傳不載

七年黎州蠻蓄卜始降

按宋史寧宗本紀云云

按蠻夷傳八年二月蓄卜降蓄卜連年入

寇皆青羌曳失索助之守臣袁柎遣安靜等總轄杜軫招降之他如浮浪蠻白蠻烏蒙蠻阿宗

蠻則其地各有所服屬云

按此作八年與本紀不同

度宗咸淳三年權黎州張午招諭大青羌主歸義乞用兩林西蕃瑜林仍賜予加優從之按

宋史度宗本紀云云

按蠻夷傳不載

大渡河部紀事

總志唐文宗太和三年大容蠻蒙嵯巔悉眾掩邛戎嶓三州陷之入成都止西郛十日慰資居人市不擾肆將還乃掠子女工技數萬引而南人懼自殺者不勝計嵯巔身自殿至大渡河謂華人曰此吾國境爾去國當哭眾號痛赴水死者十三

懿宗咸通五年南詔回掠嵩州以搖西南西川節度使蕭鄴率屬蠻鬼主邀南詔大渡河敗之

十年坦綽酋龍自將督眾五萬侵嵩州攻青溪關屯將杜再榮走諸屯皆退保蠻攻黎州詭服漢衣濟江襲隄爲破之 十一年坦綽酋龍攻杜再榮竇滂自勒兵戰酋龍遣使者十輩請和滂信之